



Broj: **01/2,03/11-05-1-75/15**
Sarajevo, 4.5.2015.

KOMISIJI ZA VANJSKE POSLOVE PREDSTAVNIČKOG DOMA

KOMISIJI ZA VANJSKU I TRGOVINSKU POLITIKU, CARINE, SAOBRAĆAJ I KOMUNIKACIJE DOMA NARODA

IZVJEŠTAJ

sa 6. sastanka predsjednika odbora/komisija za vanjske poslove parlamenata zemalja Jugoistočne Evrope, Beograd, 15. i 16. april 2015.

U Beogradu je 15. i 16. aprila 2015. godine održan 6. sastanak odbora/komisija za vanjske poslove parlamenata zemalja Jugoistočne Evrope – Bosne i Hercegovine, Crne Gore, Hrvatske, Makedonije i Srbije. Na sastanku su učestvovalе parlamentarne delegacije odbora/komisija za vanjske poslove Bosne i Hercegovine (Dušanka Majkić, predsjedavajuća Komisije, Monika Tomić, prva zamjenica predsjedavajuće, i Nermina Kapetanović, druga zamjenica predsjedavajuće), Crne Gore (Miodrag Vuković, predsjednik Odbora, Žana Filipović i Milan Knežević, članovi), Hrvatske (Milorad Pupovac, predsjednik Odbora, i Gvozden Srećko Flego, šef Delegacije u PSVE-u), Makedonije (Antonijo Milošoski, predsjednik Odbora) i Srbije (Aleksandra Đurović, predsjednica Odbora, Dijana Vukomanović, zamjenica predsjednice, te Marija Obradović, članica).

Tema sastanka bila je saradnja nacionalnih delegacija u međunarodnim parlamentarnim organizacijama. Na sastanku su predstavljeni prioriteti i aktivnosti u okviru predsjedavanja Republike Srbije Organizacijom za sigurnost i saradnju u Evropi (OSCE) i u okviru predstojećeg predsjedavanja Bosne i Hercegovine Vijećem Evrope. Na sastanku su, također, predstavljeni i rezultati konferencije parlamentarki iz zemalja Jugoistočne Evrope „Ravnopravne i osnažene - zajedno smo jače“, koja je održana u Beogradu, 2. marta 2015. godine.

Učesnici sastanka odbora/komisija za vanjske poslove parlamenata zemalja Jugoistočne Evrope – Bosne i Hercegovine, Crne Gore, Hrvatske, Makedonije i Srbije, vođeni spremnošću za saradnjom utemeljenom na zajedničkim interesima i evropskom perspektivom regiona, razmijenili su mišljenja o temama sastanka i:

1. Naglasili važnost regionalne saradnje odbora/komisija za vanjske poslove u daljnjem razvijanju parlamentarnog dijaloga, promoviranju evropskih vrijednosti i razmjeni najboljih praksi;

2. Saglasili se da evropske integracije značajno doprinose jačanju regionalne i prekogranične saradnje, promociji dobrosusjedskih odnosa i međusobnog poštivanja, kao preduslova za stabilnost i istinsko i trajno pomirenje u regionu;
3. Podržali predsjedavanje Srbije OSCE-om i njenu konstruktivnu ulogu i aktivan doprinos stabilizaciji stanja u istočnoj Ukrajini, kao i konstruktivno učešće u ostalim prioritetnim oblastima zvaničnog predsjedavanja;
4. Pozdravili predstojeće predsjedavanje Bosne i Hercegovine Vijećem Evrope i predstavljene prioritete njenog predsjedavanja;
5. Podržali predsjedavanje Makedonije Centralnoevropskom inicijativom (CEI).

Na 6. sastanku odbora/komisija za vanjske poslove parlamenata zemalja Jugoistočne Evrope izneseni su i sljedeći stavovi:

6. Sastanci odbora/komisija za vanjske poslove parlamenata zemalja Jugoistočne Evrope treba da budu forum za razmjenu informacija i otvoreni politički dijalog o svim otvorenim ili pitanjima koja se mogu javiti među državama učesnicama. Učesnici apeliraju na nacionalne parlamente i vlade da doprinose rješavanju otvorenih pitanja blagovremenim otvaranjem političkog dijaloga;
7. Podržana je ideja redovnih razmjena mišljenja o aktuelnim pitanjima na marginama sastanaka Interparlamentarne konferencije o zajedničkoj vanjskoj i sigurnosnoj politici i zajedničkoj sigurnosnoj i odbrambenoj politici Evropske unije (CFSP/CSDP);
8. Učesnici su se saglasili o značaju izbora budućeg generalnog sekretara UN-a iz regiona Istočne Evrope i podržali ideju međusobne podrške prilikom izbora generalnog sekretara UN-a tokom 2016. godine;
9. Saglasili su se da nacionalne delegacije treba da unapređuju međusobne odnose kooperativnim partnerstvom i dogovorom, saraduju na predstavljanju i afirmaciji pojedinačnih i zajedničkih interesa i jačaju ulogu regiona Jugoistočne Evrope u multilateralnim parlamentarnim organizacijama;
10. Istakli su potrebu međusobnog usaglašavanja i koordiniranog nastupa u aktivnostima multilateralnih parlamentarnih organizacija u vezi s temama na dnevnom redu zasjedanja, prijedlozima za popunu upražnjenih funkcija i drugim aktuelnim pitanjima iz domena rada međunarodnih organizacija;

11. Podržali su ideju održavanja redovnih konsultacija nacionalnih delegacija na marginama plenarnih zasjedanja multilateralnih parlamentarnih organizacija u čijem radu učestvuju;
12. Pozdravili su rezultate konferencije parlamentarki iz zemalja Jugoistočne Evrope „Ravnopravne i osnažene - zajedno smo jače“, održane 2. marta 2015. godine u Beogradu, i potpisivanje Memoranduma o saradnji između učesnica konferencije, kao i namjeru parlamentarki da sarađuju u razvoju i provođenju aktivnosti čiji je cilj poboljšanje rodne ravnopravnosti u državama i regionu Jugoistočne Evrope;
13. Dogovorili su se da naredni sastanak odbora/komisija za vanjske poslove parlamenata zemalja Jugoistočne Evrope bude održan u Skoplju u drugoj polovini 2015. godine.

Izvještaj sačinila: Merdžana Iglica, sekretar Komisije za vanjske poslove PDPSBiH

Dostavljeno:

- naslovu
- a/a